



Resolución Reitoral do 9 de febreiro de 2018 pola que se aproba o procedemento transitorio para a avaliación por compensación en estudos de Grao.

A vixente “Normativa de permanencia e progreso nas titulacións oficiais de grao e de máster da Universidade de Vigo” establece que a Universidade aprobará, entre outros, os procedementos para a avaliación por compensación en estudos de grao. Dada a necesidade de adecuar a dita normativa á situación actual do estudiantado, esta Reitoría

RESOLVE:

Primeiro. Obxecto

A presente resolución ten por obxecto regular o sistema de avaliación por compensación (AC) nas titulacións de grao, así como a composición e o funcionamento das comisións de compensación que, para tal efecto, se constitúan nas facultades e escolas ata que se aprobe o novo regulamento de avaliación e cualificación da Universidade de Vigo.

Enténdese como avaliación por compensación o mecanismo polo que se avalía en conxunto a traxectoria académica e o labor realizado por unha ou un estudiante ao final dos seus estudos para determinar se acadou os suficientes coñecementos e competencias que lle permitan obter a titulación académica á que opta, compensando materias que non teña superadas.

Esta resolución aplicaráselle a todo o alumnado que cumpra os requisitos que se indican nos apartados correspondentes.

Segundo. Requisitos para admitir a trámite as solicitudes

Poderá solicitarse a avaliación por compensación cando se cumpran os seguintes requisitos:

- Que cando menos o 50% dos créditos da titulación foran cursados na Universidade de Vigo.
- Que resten para graduarse un máximo de dúas materias que non superen entradas os 12 créditos, agás o TFG.
- Que o/a estudiante esgotara na(s) materia(s) na(s) que solicita a AC cando menos tres oportunidades de avaliación e que a cualificación obtida non fora inferior a 1 ou non avaliado en ningunha das tres oportunidades.

Universidade de Vigo - Registro Xeral
Saída Nº. 201800001899 09/02/18 09:51:48



Terceiro. Limitacións na resolución da avaliación por compensación

- a) Non serán obxecto de compensación o traballo de fin de grao, as prácticas e o prácticum, nin materias do curso de adaptación ao grao (curso ponte).
- b) O número máximo de créditos que se poderá conceder por avaliación por compensación na vida académica do alumnado será de 12.
- c) Non se lle poderá conceder a AC a unha/un estudiante que non estea matriculado na(s) materia(s) a compensar no momento de solicitar a AC.
- d) As materias compensadas non poderán ser obxecto de recoñecemento noutras titulacións da Universidade de Vigo.
- e) Non se lle podrá conceder a AC a un/unha estudiante ao/á que lle conste algunha sanción grave no seu expediente académico.

Cuarto. Criterios de resolución da avaliación por compensación

Concederase o apto por compensación da(s) materia(s) solicitada(s) tras a constatación do cumprimento de todos os requisitos do apartado segundo, das limitacións do apartado 3, e sempre que o/a estudiante se encontre en polo menos un dos seguintes supostos:

- a) Que obtivese polo menos unha vez unha cualificación igual ou superior a 3'5 na(s) materia(s) a compensar.
- b) Que a media do seu expediente sexa igual ou superior á nota media da súa titulación na última promoción con dereito a docencia.

No caso de que o/a solicitante non se encontre en ningún destes supostos ou curse unha titulación que dea acceso a unha profesión regulada pero reúna todos e cada un dos requisitos necesarios, a solicitude será admitida a trámite para que a valore a comisión de compensación.

A comisión de compensación valorará a traxectoria académica global da/o solicitante e, en particular, na(s) materia(s) obxecto de compensación e nas materias afins (se as houbese), e analizará canta información complementaria considere oportuna. A comisión poderá solicitarlle(s) ao(s)/á(s) docente(s) responsable(s) da(s) materia(s) un informe no cal consten as consideracións relativas a todas as actividades desenvolvidas polo/a estudiante (traballos, exames, prácticas etc.).

En ningún caso se lle poderán realizar probas de avaliación ao alumnado solicitante.

Quinto. A comisión de compensación

1. Todos os centros da Universidade de Vigo contarán cunha comisión de compensación por titulación.
2. A comisión de compensación será nomeada polo centro de adscrición da materia coa seguinte composición tendo en conta a paridade entre mulleres e homes:
 - O decano/a, director/a ou persoa coordinadora da titulación na que delegue, que a presidirá.
 - Tres vogais e tres suplentes pertencentes ao profesorado da titulación. Deberán estar representadas as diferentes áreas de coñecemento que teñan asignada docencia na titulación.



- Un ou unha vogal que represente o estudantado nalgún consello dos departamentos implicados ou na xunta do centro correspondente.
- 3. A elección ou designación das persoas que formen a comisión realizarase ao comezo do ano académico e renovarase anualmente.
- 4. Non poderá formar parte da comisión o profesorado que interviñera na corrección ou avaliación da materia que se solicita compensar. De ser o caso, este deberá ser substituído por outro/a docente designado polo centro.

Sexto. Solicitudes e prazos

A solicitude de AC irá dirixida, por medio dunha instancia da/o estudiante, á dirección do centro de adscrición da materia. Esta poderá realizarse en cada periodo de avaliación dende a data de apertura de actas ata quince días hábiles despois do peche de entrega das mesmas.

Sétimo. Procedemento de resolución e notificación

1. O prazo máximo para resolver será dun mes, que comezará a contar a partir do día seguinte ao remate do prazo de presentación de solicitudes. O mes de agosto considerarase non hábil para os efectos desta resolución.
2. Cando non proceda a admisión dunha solicitude, a comisión acordará a inadmisión motivada desta e trasladaralle o acordo á/ao solicitante.
3. A comisión examinará todas as solicitudes admitidas a trámite segundo os criterios establecidos no apartado 4.
4. O acordo da comisión remitiráselle ao órgano de dirección do centro, quen ditará a oportuna resolución e comunicaralla mediante un escrito á persoa solicitante; no caso de denegación debe ser motivada. Cando se trate de titulacións que dean acceso a unha profesión regulada a resolución deberá identificar as competencias profesionais vinculadas á materia e cuxa adquisición non quede demostrada que xustifiquen a denegación.
5. A avaliación por compensación figurará no expediente de cada estudiante como «apto por compensación» sen cualificación numérica. Para os efectos de baremo do expediente, o «apto por compensación» terá a equivalencia de aprobado coa cualificación numérica de 5.

Oitavo. Recursos

No caso de que a resolución, que esgota a vía administrativa, non lle sexa favorable, poderá a persoa interesada interpoñer recurso perante a xurisdición contencioso administrativa no prazo de dous meses contados dende o día seguinte á súa notificación, de conformidade co disposto na Lei 29/1998, do 13 de xullo, reguladora da xurisdición contencioso administrativa.



Edificio Reitoría
Campus universitario
36310 Vigo
España

Tel. 986 813 590
Fax 986 812 010

www.uvigo.gal
sreitor@uvigo.es

Non obstante, a persoa interesada poderá optar por interpoñer recurso de reposición, no prazo dun mes contado a partir do dia seguinte á notificación da resolución, perante o mesmo órgano que a ditou. Neste caso non se poderá interpoñer o recurso contencioso-administrativo ata que sexa resolto expresamente ou se producira a desestimación presunta do recurso de reposición interposto, segundo o previsto no artigo 123.2 da lei 39/2015, de 1 de outubro, do Procedemento Administrativo Común das Administracións Públicas.

Contra esta resolución, que esgota a vía administrativa, poderase interpoñer recurso perante a xurisdicción contencioso administrativa, no prazo de dous meses contados desde o día seguinte á súa publicación, de conformidade co disposto na Lei 29/1998, do 13 de xullo, reguladora da xurisdicción contencioso administrativa.

As persoas interesadas poderán optar por interpoñer contra esta resolución recurso de reposición, no prazo dun mes contados a partir do dia seguinte á publicación da presente resolución, perante o mesmo órgano que a ditou. Neste caso non se podrá interpoñer un recurso contencioso-administrativo ata que sexa resolto expresamente ou se producira a desestimación presunta do recurso de reposición interposto, segundo o previsto no artigo 123.2 da lei 39/2015, de 1 de outubro, do Procedemento Administrativo Común das Administracións Públicas.

Vigo, 9 de febreiro de 2018

O REITOR



Salustiano Mato de la Iglesia